

Uunga siunnersuut: Aatsitassanut tunngasunik suliaqarneq pillugu Inatsisartut inatsisaat
(Aatsitassanut Inatsisillu Atuutsinneqarnerannut Naalakkersuisoqarfik)

Akissuteqaat

(Aatsitassanut Inatsisillu Atuutsinneqarnerannut Naalakkersuisoqarfik)

Aappassaanneerpeqarnera

Naalakkersuisut Inuussutissarsiornermut Aatsitassanullu Ataatsimiititaliaq inatsisissatut siunnersuummik peqqissaartumik suliarinninnerannut qutsavigaat.

Ataatsimiititaliami amerlanerussuteqartut siunnersuutip akuerineqarnissaa inassutigaa.

Taamaattoq Ataatsimiititaliap siunnersuutip pingajussaanneerpeqarnissaanut allannguutissatut siunnersuummik saqqummiussinissamik Naalakkersuisut kaammattorpai. Allannguutissatut siunnersuut ilaatigut siunnersuummi siunertanut aalajangersakkamut ilaatigullu sumiiffinnik nunap sannaani soqutigisaatilinnik eqqissimatitsisarneq aammalu siunnersuut malillugu ingerlatassanik killilersuiffiusunik killeqarfinnik atuutsitsilertarneq pillugit siunnersuummi § 128-mut tunngassuteqarpoq. Siunertanut aalajangersakkap annertusitinnissaa aammalu eqqissimatitsisarneq killeqarfinnullu atuutsitsilertarneq pillugu aalajangersagaq, Naalakkersuisunit nalunaarutitut ilusilimmi aalajangersaasarnermut taarsiullugu, inatsimmi Inatsisartunit akuerineqartussa, kissaatigineqarput.

Ataatsimiititaliap isumaliutissiissutaani oqaatigineqartut, Ataatsimiititaliap Naalakkersuisullu akornanni oqaloqatigiittoqarpoq, aammalu Naalakkersuisut ataatsimiititaliap isummersuutai isumaqatigaat.

Taamaattumik Naalakkersuisut siunnersuutip pingajussaanneerpeqarnissaanut allannguutissatut siunnersuutit siunnersuutigineqartut saqqummiunniarpaat.

Naalakkersuisut maluginiarpaat Ataatsimiititaliaq siunnersuutip tusarniaassutigineqarnerani akissuteqaatinut tiguneqartunut arlalinnik oqaaseqaateqartut. Ilanngullugu Kalaallit Nunaanni aatsitassarsiornermi suliffissuarni peqquserluttoqarsinnaanerata aarlerinaateqarneranut tunngatillugu, pingaartumik Kalaallit Nunaanni aatsitassanut nunani tamalaani soqutiginninnerup annertusiartuinnarneranut tunngatillugu.

Naalakkersuisut Ataatsimiititaliap isumanerluutai tusaatissatut tiguaat, aammalu peqquserluttoqarsinnaanerata aarlerinaateqarneranik pakkersimaarinissamut aningaasassat ullutsinnut naleqquttuunissaat siunissami sianigissallugu, aammalu Kalaallit Nunaanni aatsitassanut suliffissuaqarnerup ineriartornera pisussat malinnaaffigissallugu.

Ataatsimiititaliami amerlanerussuteqartut siunnersuutip akuerineqarnissaa inassutigimmassuk, Naalakkersuisut sinnerlugit nuannaarutigaa.

Naalakkersuisut taamatut oqaaseqarlutik siunnersuut aappassaanneerpeqartussanngortippaat.